

Արտատպված է՝ Դերենիկ Դեմիրճյան, Երկերի ժողովածու, հատոր IV, Ե., 1978:

«ԱՆԱՍՏՎԱԾ» ԿՈՆԵԿՏԻՎԸ

Հռիփսիմեի վանքի¹ բլրակի հետև բարձր պարիսպներով շրջափակված է «Ղռի այգին»։ Սա մեկն է այն վանքապատկան այգիներից, որ պետականացավ Նորերս։ Այժմ նա գտնվում է բատրակների կոլեկտիվի ձեռքին։ «Վանքի կոլեկտիվը» մեքենաբար ասում են երբեմն՝ լավ չխորանալով ներքին իմաստի մեջ...

«Անաստվածների կոլեկտիվ» է կոչվում սովորաբար այն խումբը, որ այժմ տիրել և մշակում է այս կավածը։

Հնամյա դարբասը ճռնչալով ճամփա է բացում մեզ համար և մենք մտնելով ներս, մի պահ կանգ ենք առնում մի ընդարձակ, բարձիթող արած այգու գլխին։

Գորշ, դեղնավուն նրա մակերեսի վրա տեղ-տեղ երևում են վտիտ, ազագուն վազեր և կիսաչոր հարթությունը տեղ-տեղ թարմացած է, սև հողը շուռ է եկել դեպի արևերես։ Դա բատրակների բահերի տեղերն են։ Այգին մշակվում է։ Բայց մարդը չի երևում։ Գնում ենք առաջ։

Այգու մեջտեղ մի ավերակ է կքված։ Հնձանն է։ Նրա պատի տակ են ժողովվել բատրակները։ Մոտենում ենք, բարևում։

— Հանգստի ժամ էր,— բացատրում է կոլեկտիվի վարչության նախագահը,— մենք էլ օգտվեցինք՝ ժողով արինք։

Բոլորովին չքավոր մարդիկ նստած ու պառկած՝ հանգստանում են շոգից և աշխատանքից։ Կան կանայք, աղջիկներ, տղաներ, ծերեր, բայց մեծ մասը երիտասարդներ են։

Քրտինքը պլպլում է նրանց դեմքին։

Նախագահի հետ հեռանում ենք դեպի դիմացի չինարին, դիտելու այգին։

Վիճակագրությունը— 35 չքավոր տնտեսություն, 115 շունչ, 4 հասակավոր-ծեր, 72 երիտասարդ, կին, տղա, աղջիկ՝ աստիճանական աշխատունակությամբ։ Վարկավորումը² 6400 ռ. որից՝ այգու մշակության համար 630 ռ., Նորատուճիկ այգիների համար 1700 ռ., գյուղատնտեսական գործիքների համար 1800 ռ., ձիերի համար 900 ռ., զանազան՝ 400 ռ.։ Տեղտնտեսությունը, որ ամեն օգնություն պատրաստ է հասցնելու կոլեկտիվին՝ նրան հատկացրել է՝ մի մոտորադաշ։ Հայգյուղկոոպը նվիրել է մի տրակտոր։ Գավառական գյուղատնտես ընկեր Թումանյանը շաբաթը 2 օր այցելում է ցուցմունքներ տալու։ Վարչություն, հաշվապահություն, աշխատանքի կանոններ, ժողովներ, կարգապահություն։ 14-ը կոմերիտ են, 4-ը կուսանդամ, 4 թեկնածու, մնացածն անկուսակցական։

Բոլորը բատրակներ են եղել, մեկը խոհարար։ Մեծ մասը տաճկահայեր են։ 3 տնտեսություն Վաղարշապատից իրենց տնտեսությունը թողել են հողբաժնին և եկել միացել են այս կոլեկտիվին։ Մացակ Մարտիրոսյանը, 10 տարվա բատրակ, մտել է Վաղարշապատի տեխնիկումը, 3-րդ տարին է սովորում է։

— Կավարտի, ուսուցիչ կդառնա մեր կոլեկտիվում,— ասում է նախագահը,— ուժեղ է, քաղաքականապես շատ է առաջ։

Չինարին ստվեր է ձգում մեզ վրա։ Ինձ առաջարկում են նստել միակ քարի վրա, որ ծառի բնի մոտն է ընկած։ Դա մի գեղաքանդակ բեկոր է ինչ-որ հին շենքի։

— Սա մեր ժողովատեղին է,— բացատրում է նախագահը և ինքը նստում է ձիու չոր գանգի վրա։

Ընկեր Չեբեղը բնիկ վաղարշապատցի է։ Փուռ, կոոպերատիվ, կոշկակարություն, զինվորություն, բատրակություն— ահա նրա կյանքի դպրոցը։ Կարիքի դաժան սեղմիչ մեքենաները, անդուլ, ֆիզիկական աշխատանքը, կյանքի պայքարը նրա սև ու չոր դեմքին մի խորը կնիք է դրել։ Նա թախծալի ժպիտ ունի և հանգիստ, բարի հայացք։ Կյանքի բովում նա եփվել, ամեն ինչ հասկացել է և խմելով նրա դառնությունները՝ նա գիտե, թե ինչ պիտի անի։ Ուստի և հանգիստ է իր գործի մեջ։

— Ինչպե՞ս է կոլեկտիվի անդամների փոխհարաբերությունը:

— Ուժեղ կարգապահություն է: Ոչ մի խախտում: Կան ուժեղ աշխատողներ, կան անսովորներ, բայց ծուլացող չկա: Դե, իրենց սեփական գործն է,— ժպտում է ընկեր Չեբեդը, իբրև ուժեղ հիմք բերելով այդ միտքը:

— Իհարկե գոհ են այս նոր վիճակից:

— Գոհ են, իհարկե,— և նրա նիհար դեմքն ավելի է պայծառանում,— միայն...

— Վաղը 50 փուլ հաց կստանաք,— կայցնում է ընկեր Եղիազարյանը, ձեռաց, թույլ չտալով որ այդ պայծառ ժպիտը սառչի՝ հացի մտահոգությունից:

— Դե, մեր դրությունն ընկեր Տրդատ, դուք լավ գիտեք,— արդարանում է նախագահը:

Ախր բանը նրանումն է, որ կոլեկտիվը, ճիշտ է, իբրև թե տնտեսություններ ունի,— մի կով, մի եզ, մի-մի ոչխար, բայց հիմա, երբ նրա անդամներն էլ չեն բանում ուրիշի տնտեսություններում և ոչ մի օրավարձ չունեն դրսից՝ այս թույլիս իսկական թռչունների օրումն են: Նրանք ունեն հողեր, 50 դեհատին, որից 34-ն այգի, 16-ը վարելահող—բայց այս թույլիս հաց չունեն: Դեռ ձկները ծովումն են, պետք է որսալ: Ընկեր Չեբեդն ուրախացավ: Հանապազօրյա հացի խնդիրը լուծվեց: Պատմում է իրենց ժողովների մասին:

— Դուք ո՞նց եք էս կաթողիկոսական տեղը նստում,— կատակում է ընկեր Տրդատը նախագահի հետ, ցույց տալով այն քարը, որի վրա նստած էի ես:

(Այստեղ է եղել նստելիս խրիմյանը)³:

— Ո՞նց անենք, ժողովատեղ չունենք: Մնացել ենք բացը,— բացատրում է նախագահը,— ժողովատեղներս կամ են հնձանի պատի տակն է, կամ էս չինարին:

Կոլեկտիվն ամեն շաբաթ երեկո հավաքվում է այս չինարու տակ ժողովի: Քարը ծառայում է որպես սեղան կամ որպես նստարան՝ նայած թե տվյալ մոմենտին ինչի՞ կարիք ունի այս «բացօթյա» կոլեկտիվը: Արձարժվում են և ամեն տեսակի խնդիրներ: Հասկանալի բան է, առայժմ գերակշռում են տնտեսական խնդիրները: Բայց, իհարկե, քաղաքական խնդիրները նույնպես տեղ են բռնում: Արձարժվող խնդիրներն առաջ են գալիս շատ անգամ ժողովի ժամանակ, անսպասելի... որովհետև կոլեկտիվն ակտիվ մասնակցում է իր տնտեսության հարցերի քննության և շատ անգամ (հետագայում ինչպես պարզեց գյուղատնտես ընկեր Թումանյանը) իրենք են որոշ դիրեկտիվներ տալիս ղեկավարության, թարմ, կենդանի հարցեր առաջ բերելով: Կանայք ևս ակտիվ են:

Բատրակները հանգստացել են և արդեն բահերն առած ընկել են այգու վրա, աշխատում են: Գնում ենք նրանց կողմը:

Հնձանի ստվերից դեպի մեզ է շարժվում մի սևազգեստ, կորաքամակ պառավ: Նա ճոճվում է խորդուբորդերի մեջ: Նիհար է նա, սաստիկ արևառ, կնճռոտ և վտիտ ձեռքը մեկնելով նշան է անում նախագահին: Մենք սպասում ենք, որ գա հասնի:

— Սա էլ իմ մայրիկս է,— ասում է Չեբեդը և մեղմ, հովանավոր ժպտով նայում է պառավին:

— Բարև, մայրիկ:

Ծխախոտ է ուզում որդուց:

— Զանի՞ տարեկան ես: (Ծանր է լսում): Որդին մոտենում է ականջին և բարձր կրկնում հարցը.— Զանի՞ տարեկան ես:

— Եսի՞մ, որդի... Լոռիս Մելիքովի⁴ կռվին աղջիկ էի:

Ի՞նչ հնություն... Աշխատո՞ւմ ես, մայրիկ...

— Ո՞նց կլի, որ չաշխատեմ... Հա, հմի լավ ա որ ազատ ենք: Մի օրը մի տեղ էինք փախչում: Թագավորի ժամանակ... թագավորի ժամանակ ի՞նչ լավ էր, չարչարանքը զոռ էր...

Բայց պառավը մեկ-մեկ անհանգիստ շարժումներ է անում: Մտահոգ է ինչ-որ: Ընկեր Չեբեդն ականջը մոտեցնում է պառավի բերանին: Սա ինչ-որ բան է լսիտում: Հանկարծ նախագահը քրքջում է:

— Չէ, չէ, մի՛ վախի...

— Եսի՞մ, բայա ջան, ես էլ ասըմ եմ չըլի թե նոր բան ա դուս եկել, բաղերն ուզում են ետ խլեն:

Մեր գալը կասկած է գցել պառավի մեջ թե՛ կարելի է եկել ենք բաղը ետ գրավելու...

Աշխատանքը եռում է: Կոլեկտիվի անդամները բահերով հարձակվել են վանքապատկան հողի վրա և արագ-արագ հարվածում են: Հարվածում են, հողի սիրտը հանում ու հետ-հետ քաշվում: Իսկ կանայք ու աղջիկները քանդված հողից հանում են վազի արմատներն ու թափ տալով՝ հավաքում են գոգնոցների մեջ: Նոր եմ նկատում, որ պառավն էլ նրանց մեջ է:

Առողջ ու ջլապինդ բազուկները պրկվում են, քրտինքը հոսում է ճակատներից ուղիղ հողի մեջ: Նրանք նվում են և հարվածում:

— Անաստվա՞ծ եք դառել, ընկերներ:

— Ի՞նչ անենք, աստուծով էինք՝ բան չտեսանք, անաստված դառանք, որ տեսնենք:

— Մի քիչ հանգիստ աշխատեցեք, շուտ կթուլանաք:

— Հանգի՞ստ... ժամանա՞կ կա..., — հարում է մի թուխ, եփվող երիտասարդ, — ուշացել ենք:

Այո, նրանք ուշացել են դարեր... Չեմ ուզում խոսակցություններով հոգնեցնել նրանց: Դիտում եմ: Դիմացս բարձրանում է Հռիփսիմեի հուշարձանը, արդեն իբրև թանգարանային, գեղեցիկ առարկա: Բայց կյանքն ուզում է ապրել: Եվ ահա ապրում է նա: Կյանքը — այս նախկին բատրակները: Նրանք օղակել են այս վանքը, նրա շուրջն ստեղծել են նոր կյանք — իսկ նրան գցել են թանգարան: Նա պատմություն է արդեն: Դեղնավուն մամուռը փոշու հետ նստել է գմբեթների վրա և նա քնած է արդեն: Իսկ այստեղ մի ուրիշ փոշի է եռում — կյանքի, աշխատանքի, նոր պատմություն: Հողի մարդը, հողի պրոլետարը տիրացել է իր դարավոր իրավունքին՝ իր հողին և այժմ ընկել է նրա վրա, ծեծում, հարվածում է հեծի, փորում, քանդում է, ուզում է մտնել նրա մեջ, միանալ նրան և նրա հետ ծլել, ծաղկել, արդյունավորել ու ապրել:

Մեկը մեկից երիտասարդ տղերք, մեկը մեկից եռանդուն, հուսալից, համերաշխ, ուրախ, ուղղակի ուտում են հողը: Ահա նրանցից մի քանիսը — հենց այս այգում նախկին բատրակ էր, հիմի՝ տեր: Ահա մի ուրիշը, 1914-ին եկել է Տաճկաստանից: Եղել է Կարմիր բանակում — ապա բատրակ:

— Իսկ Տաճկաստանում ի՞նչ էիր:

— Դե, Էստեղ էլ բատրակ էի:

— Սա էլ մեր «շոֆերն» է, — ցույց է տալիս ընկեր Չեբեդը մի երիտասարդի վրա, որ փորում է նրանց հետ, — տրակտորի գործում ազատ ժամանակ որ գտնում է, վազում է փորելու:

— Ընկերներ, ձեր այս հողը կարո՞ղ է մեկը խլել ձեր ձեռից:

— Ո՞վ, ապա ո՛ւր է բահը, — ծիծաղում է մի ուժեղ երիտասարդ:

Մենք շնորհակալություն ենք հայտնում բոլորին, ընկեր Չեբեդին և հեռանում:

Կոլեկտիվն ունի լավ ուժեր, տրակտորիստներ, մեխանիկներ, ունի գյուղատնտեսի ղեկավարություն. նախագահը տակտով և կտրուկ մտքի տեր երիտասարդ է, միանգամայն գիտակից: Կոլեկտիվը վարել է բոլոր բամբակացան հողերը: Արդեն նրա տրակտորը դրսի աշխատանք էլ է կատարում և բավական գումար շահում կոլեկտիվի համար:

Հող է ստացել նաև տնային շինարարության համար:

— Մի երեք տարուց հետո քաղաքի ղեկավարությունը նրանց ձեռին կլինի, — ասում էր գյուղատնտես ընկեր Թումանյանը:

Դա ակներև է:

«ԱՆԱՍՏՎԱԾ» ԿՈՆԵԿՏԻՎԸ

(Էջ 71)

Առաջին անգամ տպագրվել է ԽՅ, 1928, № 123: Ինքնագիրը չի պահպանվել: Տպագրվում է նույնից:

1 Հայկական ճարտարապետության նշանավոր կոթողներից մեկը՝ ս. Յոփսիմե տաճարը հիմնադրվել է 618 թ.:

2 1926 թ. հոկտեմբերի 9-ին ՍՍՀՄ Ժողկոմխորից որոշում է ընդունել չքավորական տնտեսությունների վարկավորման ֆոնդ ստեղծելու մասին: Վարկավորման այս ֆոնդը մեծապես նպաստել է կոլեկտիվ տնտեսությունների ամրապնդմանը և զարգացմանը:

3 Խրիմյան Մկրտիչ (1820—1907) — ամենայն հայոց կաթողիկոս (1892— 1907), գրող, հասարակական-մշակութային գործիչ:

4 Նկատի ունի 1877—1878 թթ. ռուս-թուրքական պատերազմը, որի ժամանակ կոմս Միքայել Լորիս-Մելիքովը (1825—1888) եղել է կովկասյան հատուկ կորպուսի հրամանատարը: